

Mien - Njoux Ging-Sou - Salvation Scriptures

E^fe^so 2:2 Wuov zanc meih mbuo kungx gan baamh gen orqv haic nyei za'eix hnangv. Meih mbuo muangx gunv ndaamv-lungh wuov dauh, dongh ih zanc yiem maiv muangx Tin-Hungh nyei waac wuov deix mienh nyei hnyouv zoux gong wuov dauh mienv.

Matv^taai 6:10 Tov bun meih zoux Ziouv gunv mienh nyei hnoi taux. Tov bun yiem naaiv baamh gen nyungc-nyungc ei meih nyei eix cuotv daaih, hnangv yiem tin-dorngc nyungc-nyungc ei meih nyei eix cuotv daaih nor.

Lugaa 22:42 Ninh gorngv, "Aa Die aah! Se gorngv ei Die nyei eix nor, tov zorqv nqoi yie oix zuqc hopv naaiv norm zaanv. Mv baac maiv dungx ei yie nyei eix. Oix zuqc ei Die ganh nyei eix hnangv."

Yo^han 16:7-9 Mv baac yie gorngv zien mbuox meih mbuo, yie nzuonx mingh se weic bun meih mbuo gauh duqv longx. Se gorngv yie maiv nzuonx, Tengx Mienh Wuov Dauh maiv daaih lorz meih mbuo. Yie nzuonx mingh, yie ziouc paaiv ninh daaih lorz meih mbuo. 8 "Tengx Mienh Wuov Dauh daaih wuov zanc, ninh oix biux mengh bun baamh mienh hiuv duqv ninh mbuo dorngc taux zuiz nyei jauv, taux zoux horpc nyei jauv, aengx taux siemv zuiz nyei jauv. 9 Taux zuiz nyei jauv, laaix ninh mbuo maiv sienx kaux yie.

2 Ti^mo^tai 2:10 Hhangv naaic yie weic Tin-Hungh ginv daaih nyei mienh diev nyungc-nyungc, weic bun ninh mbuo kaux Giduc Yesu duqv njoux yaac duqv yietc liuz nyei njang-laangc.

Lomaa 15:20,21 Yie liepc dingc hnyouv kungx oix mingh mienh maiv haiz jiex Giduc nyei mbuox wuov deix dorngx zunh kuv fienx hnangv. Yie maiv oix douh mienh zuangx jienv caa ziouc mingh bangc wuov gomv biauv. 21 Hhangv Ging-Sou gorngv nor, "Dongh maiv duqv mienh mbuox jiex ninh nyei jauv-louc wuov deix oix duqv buatc. Maiv haiz jiex nyei mienh yaac oix mengh baeqc."

Gong-Zoh 2:36,37 "Hhangv naaic, I^saa^laa^en nyei zuangx mienh oix zuqc hiuv dingc, dongh meih mbuo ding ziepc nzaangc jaax naaiv dauh Yesu, Tin-Hungh orn zoux Ziouv yaac zoux Giduc." 37 Zuangx mienh haiz liuz naaiv deix waac, ziouc haiz hnyouv mun haic, hnangv ga'naaiv baqv jienv mba'nziu nor. Ninh mbuo naaic gaax Bide caux yietc zungv gong-zoh, "Gorx-youz aah! Yie mbuo oix zuqc hnangv haaix nor zoux?"

Hipv^lu 4:2 Yie mbuo haiz liuz kuv fienx hnangv ninh mbuo haiz nor. Mv baac ninh mbuo haiz liuz nyei kuv fienx maiv tengx haaix nyungc ninh mbuo, weic zuqc haiz liuz ninh mbuo yaac maiv sienx.

Ye^le^mi 24:7 Yie oix bun ninh mbuo maaih hnyouv hiuv duqv yie se Ziouv. Ninh mbuo ziouc zoux yie nyei baeqc fingx, yie yaac zoux ninh mbuo nyei Tin-Hungh, weic zuqc ninh mbuo oix buangv hnyouv nzuonx daaih lorz yie."

Gong-Zoh 16:14 Maaih dauh Ti^yaa^ti^laa Zingh nyei m'sieqv dorn, mbuox heuc Li^ndie. Ninh nyei gong se maaic setv luoqc nyei ndie-zuqv. Li^ndie se zaangc Tin-Hungh nyei mienh. Ziouv yaac bun ninh nyei hnyouv nqoi, hnamv duqv

tong Baulo gorngv nyei waac.

Matv^taai 13:14,15 Ninh mbuo doix-diuc nzengc I^saa^yaa douc nyei waac. Ninh gorngv, 'Meih mbuo ndongc haaix muangx, meih mbuo maiv haih bieqc hnyouv, ndongc haaix mangc, yaac maiv maiv mengh baeqc. 15 Weic zuqc naaiv deix baeqc fingx nyei hnyouv nzotv, ninh mbuo zotv jienv m'normh kuotv yaac njipv jienv m'zing. Maiv zei aeqv, ninh mbuo nyei m'zing haih mangc duqv buatc, m'normh haih muangx duqv haiz, hnyouv yaac haih mengh baeqc, ziouc huin nzuonx daaih bun yie zorc longx ninh mbuo.'

I^saa^yaa 6:9,10 Ninh gorngv mbuox yie, "Oix zuqc mingh mbuox naaiv deix baeqc fingx, " 'Meih mbuo muangx liuz aengx muangx, yaac maiv bieqc hnyouv. Meih mbuo mangc liuz aengx mangc, yaac mangc maiv buatc. 10 Bun naaiv deix mienh nyei hnyouv morngz, bun ninh mbuo nyei m'normh zietc, yaac bun ninh mbuo nyei m'zing mbuov. Nziex ninh mbuo nyei m'zing mangc duqv buatc, ninh mbuo nyei m'normh muangx duqv haiz, ninh mbuo nyei hnyouv yaac haih mengh baeqc, iouc nzuonx daaih duqv zorc longx.' "

Maako 4:11,12 Yesu dau, "Tin-Hungh zoux Ziouv gunv mienh wuov deix gem jienv nyei sic Tin-Hungh bun meih mbuo hiuv mi'aqv. Mv baac ga'nyiec nyei mienh kungx haiz naaiv deix yietc zungv sic benx waac-beiv hnangv. 12 Weic naaiv, 'Ninh mbuo ndongc haaix mangc yaac mangc maiv buatc, ndongc haaix muangx yaac muangx maiv bieqc hnyouv. Se gorngv ninh mbuo mengh baeqc nor, nziex ninh mbuo haih goiv hnyouv lorz Tin-Hungh. Tin-Hungh ziouc guangc ninh mbuo nyei zuiz.'"

Yo^han 12:39,40 Weic naaiv ninh mbuo maiv haih sienx. Weic zuqc I^saa^yaa aengx gorngv, 40 "Tin-Hungh bun ninh mbuo nyei m'zing maengh, yaac bun ninh mbuo nyei hnyouv ngaengc. Nziex ninh mbuo nyei m'zing haih mangc duqv buatc, ninh mbuo nyei hnyouv yaac haih mengh baeqc ziouc huin nzuonx daaih bun yie zorc longx ninh mbuo."

Lomaa 11:7,8 Wuov nyungc hnangv haaix nor? I^saa^laa^en Mienh lorz nyei, ninh mbuo lorz maiv buatc. Mv baac dongh Tin-Hungh ginv daaih zoqc nyei wuov deix lorz duqv buatc. Zengc njiec wuov deix hnyouv ngaengc mi'aqv. 8 Hnang Ging-Sou fiev jienv gorngv nor, "Tin-Hungh yaac bun ninh mbuo nyei hnyouv morngz mi'aqv. Taux ih jaax hnoi bun ninh mbuo nyei m'zing mangc maiv buatc, m'normh yaac muangx maiv haiz."

2 Te^saa^lo^ni^gaa 2:10,11 Ninh yaac oix longc nyungc-nyungc guv guaix nyei orqv za'eix nduov oix zuqc mietc nyei mienh. Ninh mbuo zuqc mietc weic zuqc ninh mbuo maiv hnamv pien leiz ziouc maiv duqv njoux. 11 Weic naaiv Tin-Hungh bun ninh mbuo zuqc nduov mienh zoux dorngc nyei qaqv gunv jienv, nduov ninh mbuo sienx jaav nyei.

Matv^taai 13:18-23 "Wuov nyungc, meih mbuo muangx gaax, haaz nyim nyei waac-beiv hnangv haaix nor. 19 Haaz ndortv jauv wuov deix nyim se hnangv mienh haiz Tin-Hungh zoux Ziouv gunv mienh nyei kuv fiex mv baac maiv mengh baeqc. Yiem ninh mbuo nyei hnyouv wuov deix kuv fiex, huiang orqv wuov dauh daaih caangv cuotv mi'aqv. 20 Haaz ndortv la'bieiv-lomc, beiv mienh yietv haiz kuv fiex ziouc a'hneiv zipv. 21 Mv baac se hnangv kuv fiex

njiéc nzungh maiv ndo, sienx maiv lauh. Laaix kuv fienx buangh zuqc sic fai zuqc mienh zoux doqc, ninh mbuo ziouc cuotv mi'aqv. 22 Haaz ndortv zuqc njimv-lomc wuov deix nyim, beiv mienh haiz kuv fienx. Mv baac laaix kuonx hnyouv nyei sic fai laaix hnamv zinh nyaanh mbiorngz jienv kuv fienx, nyim ziouc maiv haih jauh aqv. 23 Haaz ndortv ndau-longx nyei nyim, se hnangv mienh haiz kuv fienx yaac bieqc hnyouv, naaiv deix nyim ziouc ziangh duqv gitv. Maah deif yietc gouv duqv yietc baeqv gouv, maaih deif duqv luoqc ziepc gouv, maaih deif duqv faah ziepc gouv."

2 Ko^lin^to 3:15,16 Taux ih hnoi ninh mbuo haaix zanc doqc Mose nyei leiz-latc, se hnangv wuov kuaav ndie corc buang jienv hnyouv nor. 16 Mv baac haaix dauh huin daaih lorZ Ziouv, wuov kuaav ndie zorqv nqoi mi'aqv.

I^saa^yaa 30:28 Ninh nyei qieq cuotv daaih hnangv wuom buangv mouh yiems jienv faaux taux jaang. Ninh oix longc zuqc mietc nyei jauv lorh maanc guoqv, yaac zorqv hanh kouv fapv mienh nyei nzuih, ziouc dorh ninh mbuo mingh dorngc jauv.

Ho^se^yaa 11:3-7 Mv baac se dongh yie njaaux E^faa^im yangh jauv, yie longc yie nyei buoz hlorpv jienv ninh mbuo, ninh mbuo yaac maiv hiuv duqv se yie zorc ninh mbuo longx. 4 Yie longc korv-lienh mienh nyei hnyouv zoux hlaang ken ninh mbuo, yaac longc hnamv mienh nyei hnyouv zoux kou kou jienv ninh mbuo. Yie bun ninh mbuo nyei ndiangx-gaaz heng njiéc, yaac ndoqv njiéc uix ninh mbuo. 5 Ninh mbuo oix zuqc nzuonx I^yipv Deic-Bung, Atc^si^lie duqv gunv ninh mbuo, laaix ninh mbuo maiv kangv nzuonx daaih lorZ yie. 6 Mienh oix longc nzuqc ndaauv yiem ninh mbuo nyei zingh mborqv jaax, baaic waaic ninh mbuo nyei zingh nyei gaengh sorn, yaac laaix ninh mbuo caangh laangh daav nyei za'eix bun ninh mbuo zuqc mietc. 7 Yie nyei baeqc fingx kungx maaih hnyouv oix leih nqoi yie, ninh mbuo ziouc zuqc dingc ziangx oix zuqc gaaz ndiangx-gaaz, yaac maiv maaih haaix dauh haih tengx ninh mbuo zorqv nqoi.

Gong-Zoh 26:18 Yie paaiv meih mingh bun ninh mbuo haih mangc duqv buatc, bun yiem hmuangx nyei mienh haih cuotv daaih yiem njang, yaac yiem Saadaan nyei buoz-ndiev cuotv daaih lorZ Tin-Hungh. Ninh mbuo ziouc duqv zuiz guangc liuz, yaac duqv caux weic sienx yie benx cing-nzengc mienh wuov deix, maaih ninh mbuo nyei buonc.'

2 Ti^mo^tai 2:24-26 Ziouv nyei bou maiv horpc zuqc nzaeng jaax. Daaux nzuonx oix zuqc zoux longx bun zuangx mienh, oix zuqc njaaux longx yaac maaih noic. 25 Oix zuqc longc suonc hnyouv kuinx caux ninh doix-dekc wuov deix mienh. Nziex Tin-Hungh oix bun ninh mbuo maaih qangx goiv hnyouv, hiuv duqv zien leiz mv bei. 26 Hnangv naaic ninh mbuo haih nzang daaih ziouc biaux ndutv mienh nyei hungh nyei koux, dongh hlopv ninh mbuo, aapv ninh mbuo ei ninh nyei za'eix zoux.

Laauc Yaangh 3:17-19 Meih gorngv, "Yie butv zoih, nyungc-nyungc maaih nzoih, maiv qiems zuqc haaix nyungc aqv." Mv baac meih maiv hiuv duqv meih ndongc haaix kouv, ndongc haaix korv-lienh, jomc haic, m'zing mbuov, njang sin civ liv nyei yiem. 18 Yie kuinx meih maaiz yie longc louh douz sinx daaih

nyei zien jiem weic bun meih butv zoih. Yaac maaiz lui-houx-baeqc zuqv jienv bun meih maiv nyaiv, maiv zuqc laengh gaengv nyei yiem. Yaac oix zuqc tengx yie maaiz ndie nzaatv meih nyei m'zing weic bun meih haih mangc duqv buatc. 19 'Da'faanh yie hnamv nyei mienh, yie gorngv-hemx yaac mborqv njaux. Hnangv naaic, meih oix zuqc jorm daaih goiv hnyouv guangc meih nyei zuiz.

2 Ko^lin^to 7:10 Weic zuqc mienh ei Tin-Hungh nyei eix nzauh, naav nyungc nzauh haih bun mienh goiv hnyouv, ziouc duqv njoux. Hnangv naaic mienh ziouc maiv hnamv-nzuonx. Mv baac ei baamh mienh nyei za'eix nzauh nor, kungx bun mienh zuqc daic hnangv.

1 Hungh Douh 18:37 Tov meih dau yie. O Ziouv aah! Tov dau yie weic bun naav deix mienh hiuv duqv meih, Ziouv, se Tin-Hungh. Meih yaac bun ninh mbuo goiv hnyouv nzuonx daaih."

2 Ko^lin^to 4:4 Ninh mbuo maiv sienx weic zuqc gunv baamh gen wuov dauh mienv nyei hungh, Saadaan, bun ninh mbuo nyei hnyouv hmuangx, maiv mengh baeqc. Ninh nqaeqv jienv maiv bun kuv fienx nyei njang ziux ninh mbuo. Naaiv kuv fienx se gorngv Giduc, dongh zuangv Tin-Hungh wuov dauh, nyei njang-laangc.

Lugaa 8:11-15 "Naaiv diuh waac-beiv nyei eix leiz se hnangv naav. Wuov deix nyim se Tin-Hungh nyei kuv fienx. 12 Ndortv zuqc jauv wuov deix nyim beiv mienh muangx haiz Tin-Hungh nyei kuv fienx. Mv baac mienv nyei hungh daaih caangv cuotv yiem hnyouv wuov deix kuv fienx, bun ninh mbuo maiv haih sienx ziouc maiv duqv njoux. 13 Ndortv zuqc la'bieiv-ndau wuov deix nyim beiv mienh muangx haiz kuv fienx ziouc a'hneiv zipv. Mv baac se hnangv kuv fienx njiel nzungh maiv ndo. Sienx maiv lauh, buangh zuqc seix hnyouv nyei sic ziouc cuotv mi'aqv. 14 Ndortv zuqc njimv-lomc wuov deix nyim beiv mienh muangx haiz kuv fienx. Zoux gau, laaix seix zaangc kuonx hnyouv nyei sic, fai laaix hnamv zinh nyaanh, fai baamh gen nyei njien-youh nduov ninh mbuo, naav deix sic mbiorgz jienv ninh mbuo cingx daaih hnangv maiv haih jauh nyei nyim nor. 15 Ndortv zuqc ndau-longx wuov deix nyim beiv mienh haiz Tin-Hungh nyei kuv fienx, longc hnyouv ziepc zuoqv nyei sienx, yaac longc noic ei jienv zoux, cingx daaih hnangv naav deix nyim nor, ziangh duqv gitv.

Gong-Zoh 15:11 Maiv zeiz hnangv naaic lorqc. Mbou sienx mbou duqv njoux se weic Ziouv Yesu nyei en hnangv ninh mbou nor."

Lomaa 8:13 Se gorngv meih mbou ei baamh mienh nyei hnyouv hanc zoux, oix zuqc daic aqv. Mv baac se gorngv longc Singx Lingh mietc nzengc sin zaangc zoux nyei zuiz, meih mbou ziouc duqv ziangh jienv.